

晉溪本兵敷奏

晉溪本兵部

少保王恭愍

進士起家

郎官歷朝四十餘年中間播  
遷轉徙凡六歲餘皆公致用  
日也所值不同而諸所建白  
樹立皆具存牒記故在水部  
則有漕河圖誌若干卷在戶  
部則有四科十三司條例若

十卷為戶部尚書有戶部奏  
議若干卷

賜環為三邊總制有環召新疏  
若干卷正德乙亥迄庚辰公  
在本兵是時

武廟巡幸屬海內多故內憂外患  
並作公處大事決大疑嚴居  
守之策驅內侵之虜靖宸藩

之變消權璫之憂震撼倚之  
為安而天下恃以無恐此其  
為力孔艱而居功不細稽諸  
奏議可考而知也然粹不終  
篇未及傳布有志於四方者  
率以購求為難余入太原因  
訪嗣子都事內泉君蒐緝餘  
牘屬太原守江君濬為粹完

之通前為卷凡盡四京畿  
次遼薊次宣大三關次陝西  
延寧甘肅次山東河南四川  
南畿兩浙湖廣次江西次閩  
粵兩廣雲貴又次則清軍驛  
傳馬政而以雜行類終焉嗚  
呼備矣鴻創遠思邃猷傑識  
上之而昭德塞違下之而安

夏攘夷如公可不謂人傑也哉古今稱立德立功立言者為三不朽而皆有次第然而不可以無今所存皆言也所言皆事功也蓋行之而後言言之而必行非章句腐儒剽掇前人之緒餘以資天下後世之口實而無益於理亂興

衰之故者可同日語也若是  
而謂之立功與言不亦可乎  
余什褐公為冢宰選除  
命下而公卒海內方嘖嘖然十餘  
年來疆場多警

皇上有拊解之思而經營四方之  
士徃徃嘆公不可復作此豈  
無本而能然乎哉或曰公為

秀才時即慨然有志當世之  
務讀書繹文務明體適用不  
數老生常談舉進士與虎谷  
白巖諸君子潛心理道有河  
東三鳳之稱晚年自疏亦云  
學道未成為仁不熟汲汲之  
心蓋可見也其甚者樂人攻  
已之過廼抗疏論救言常不



欲以已故累臺省駸駸乎作  
法於貞光裨臣節矣然則公  
曷嘗不先事於立德也哉余  
固表而出之後有作者可以  
得公之不朽云

嘉靖甲辰仲秋吉日

賜進士中憲大夫山西按察司  
提學副使茶陵廖希顏撰

晉溪本兵敷奏序

迺正德乙亥太原晉溪王公  
以大司徒轉大司馬迄戊寅  
凡三歲天下以地方事告者  
薊州有朶顏之變江西有醴  
源之變大同有打魚川之變  
蜀與貴有普法惡香爐山之  
變浙之孝豐則湯毛九閩之

漳州則詹師富山西之孝義  
則武廷章而府江兩岸榔桂  
橫水俱各以變至公悉條奏  
得宜師行未幾相次削平宿  
患既除太平有象于是庫部  
郎中陶君心彙集成帙名曰  
本兵敷奏錄予以己卯年七  
月入兵曹獲觀全書中間如

朶顏花當狀我邊將守臣相  
視莫敢誰何公獨以為漸不  
可長龔福全擅亂擲挂守臣  
匿不以聞公因胥史之奏究  
問備至橫水翁源樂昌諸處  
檢禍滋久公以為非重守臣  
之權不可得濟或有欲執招  
撫之議者公以為宜剿或有

欲申犁庭之計者公以為宜  
撫事不中機責在守臣如雷  
電震耀威照並行萬里一息  
覈實有功則多方陳請祿廕  
交豐雖循常格而翁鬱蔀沛  
豁然開明以故人樂為用而  
成功甚速今觀敷奏之詞文  
不加點治體詳明事無贅語

槩括自在蓋定事在志裁事  
在識成事在量公造詣深密  
趨向卓毅其志剛論議弘濶  
處斷奇中其識遠而包羅巨  
細藏納垢汙其量大自古以  
奏議名家者唯唐宣公陸氏  
宣公以文學之長而發之政  
事為有餘公以政事之長而

出之文學為有本公於宣公  
固不多讓也然宣公在唐始  
合終違予嘗病其不能收拾  
人心以自隔阻公當

國家負荷之寄而繫中外倚重  
之望位日益崇譽日益盛居  
上不驕處前不忌蓋宣公遇  
適其易而命值其難公時處

其難而才通其易為不同也  
予嘗論之公之運籌決勝可  
比漢之子房而諸守臣戰勝  
攻取之策皆公運籌中事至  
於調食足餉又公戶曹之所  
優為也然則公無三傑而有  
之矣庫部欲予序諸首簡故  
本其所集者說其大意如此



若夫公自筮仕以至今日其所樹立大書特書自有太史紀載焉

明正德十有四年冬十有一月吉日

賜進士出身嘉議大夫兵部右侍郎新都楊廷儀正夫拜手書

晉書本其敷奏目錄

卷四

京畿類

卷二

薊州類

遼東類

卷三

宣府大同類

卷四

山西類

陝西延寧類上

卷五

陝西延寧類下

卷六

甘肅類上

卷七

甘肅類下

卷八

山東類

河南類

四川類

卷九

南畿類

浙江類

湖廣類

卷十

福建類

南贛類

卷十一

江西類

卷十二

兩廣類

雲貴類

卷十三

清軍類

驛傳類

馬政類

卷十四

雜行類

晉溪本兵敷奏卷一

京畿類

宋史云燕山之地易州西北乃金坡關昌平之西乃居庸關順州之北乃古北關景州之北乃松亭關平州之東乃榆關喻關之東乃金人來路凡此數關天限番漢得之則燕境可保然關內之地平灤營三州自後唐為契丹阿保機所陷以營灤隸平為平州路得燕而不得平州則關內之地番漢雜處而燕為難保矣今紫荆關即宋金坡關山海關即宋榆關古北居庸俱仍

舊而松亭關未攷自永樂初遷都于燕是為北  
京不惟全有關內之地而東盡暨無間之境北  
出上谷西北至雲中皆為中國巨鎮聚兵戍守  
又歲漕東南粟數百萬石于京師食足兵強自  
昔以來未有盛於今日者也然正統己巳胡騎  
忽薄都城正德辛未群盜縱橫近郊自後

車駕巡幸南北兵革繁興供輸勞費人情洶洶  
不安其為京畿防邊禦盜之術豈不尤難矣乎  
為陳膚見以裨時政事

照得錦衣等衛查勘過弘治十八年以前舊額軍匠

三萬八千四百四十七名正德元年新添四萬一千二百九十四名雜用跟隨人役共一萬三名既該各衛查勘明白內新添軍匠係奉

詔書該查革改正事件合無本部通行各衛將正德元年以後新添軍匠盡行裁革存省京儲仍行戶部查勘雜用跟隨人役內有辦納月錢軍匠查照造冊再行議奏照依給事中王良佐所擬每石折支銀三錢或量加折銀存積本色糧米在倉以備不虞如此庶京儲不至耗費國計可以撙節實為便益伏乞聖明鑒察俯賜施行正德十年十一月十一日具題



奉

聖旨這新添軍匠免裁革以後再不許添補雜用跟隨人役月糧每石准折銀四錢欽此

為砲火聲息事

看得京營總兵官新寧伯譚祐會同太監張永尚書王瓊計議要挑選精銳官軍馬隊二萬員名步隊一萬員名常川操練預備調用少馬一萬七千一百一十五匹先年奏准未領馬二萬三百一十三匹速行太僕寺作急調取給軍領養聽征及行戶部支與本色草料餼餼廩壯合行事宜各該衙門徑自查照預

備如再聲息緊急該部請

命將官統領庶便啓行等因見今宣大守臣節報虜賊近邊駐牧聲息重大侵犯之舉難保必無該營提督內外官新寧伯譚祐等前項所議事宜俱係先年舊例急當舉行其要請

命將官統領一節尤為當今急務合無本部會官推舉謀勇素著曾經戰陣堪充總兵官者二員堪充左右叅將者四員請  
旨各簡命一員請

勅前去團營將見操馬步官軍三萬員名常川操練

預備調用中間號頭把總管隊盛甲器械等項壹應  
軍中合行事宜悉聽今任總兵官用心籌畫選擇調  
補取用應具奏者奏請定奪本部行文太僕寺上緊  
調取堪以出戰馬一萬七千八百一十五匹照例印  
烙交兌見在營不堪馬匹并以後缺馬陸續再取補  
給行文戶部依擬處置本色草料按月支給僨餼廩  
壯前項選將練兵事宜專為振揚威武拱護京師若  
非虜賊大舉入寇不可輕出虛費邊儲待候秋冬虜  
賊遠遯聲息寧靖本部另行議奏照舊施行正德十  
一年三月十一日具題奉

聖旨是堪充總兵官的會推兩員左右叅將共推四員來看欽此

為審大計以重本兵事

看得工科給事中翟瓚所言添設提督以振軍旅等四事俱係京營要務合就查議明白開立前件伏乞聖裁正德十一年四月二十四日具題奉聖旨提督官不必添設其餘准議欽此

計開

一添提督以振軍旅前件查得正統十四年為因北虜犯順

欽命太子少保本部尚書于謙不妨部事總督軍務  
景泰三年該于謙會同武清伯石亨等議得  
北虜也先背逆天道聚衆近疆若不預為設  
法選練設使遣將調兵兵不識將意將不識  
軍情恐號令不一誤事合無於五軍三千  
神機營揀選精銳馬步官軍一十五萬分為三營選  
揀廉能驍勇之人管領操練俱聽臣等往來  
提督等因奉

景皇帝聖旨是欽此天順年間邊方寧靖十二營罷  
立總督官亦不復設成化三年為整飭兵備

事該司禮監太監懷恩等奏該本部議擬復立十二營團聚操練會推大臣一員提督本年四月二十日具題節該奉

憲宗皇帝聖旨太子少保白圭兼兵部尚書不妨部事提督十二營操練欽此成化十一年白圭病故該太監懷恩傳奉

憲宗皇帝聖旨太子少保左都御史王越不妨院事着提督十二營操練人馬欽此以後本部尚書馬文升劉大夏許進閻仲宇劉宇曹元王敞何鑑陸完并今臣瓊俱不妨部事奉

勅提督十二團營今給事中翟瓚奏要查照景泰天  
順成化等年事例添設或尚書侍郎都御史  
一員為總提督常川在營會同操練不妨以  
他務不奪以他官無非欲委任專一整飭軍  
旅之意不為無見但查前項節年事例于謙  
等俱以本部尚書不妨部事提督內王越以  
左都御史不妨院事提督今要添設一員專  
管提督係干事體重大臣等擅難定擬伏乞

聖裁

二慎選舉以將材前件查得先為選將領以

實武備事該司禮監太監爾敏題稱閱視京  
營坐營侯伯都督等官比較馬步弓箭詢其  
韜畧大意次及大小號頭把總官員一體比  
較試驗馬步弓箭分別等第量加罰治中間  
若有年力不堪官員亦就罷黜若仍以每年  
春秋二次閱視不無太密若用五年一次又  
恐太疎合無斟酌疎密以後每遇三年之期  
兵部奏請照例舉行等因正德八年九月二  
十三日具題節該奉

聖旨是欽此通行欽遵外正德十一年八月和該三



年閱視之期今給事中翟璣奏稱把總以上等官闡茸不材者十常八九要行本部尚書會同內外提督大臣嚴加考選把總號頭等官貪墨太甚者盡行汰黜謀勇素著會中武舉者盡行收用遇有分守守備官缺以次推用所言誠為有理但查今年正該閱視之期合無至期本部尚書公同

欽差司禮監太監等官依其所擬照例考選閱視從公進退務令得人遇有員缺照例推用及查坐營坐司侯伯都督等官舊例俱該本部會

同各營提督武臣推舉上請簡用原無會同  
內外提督考選事例合無亦候開視之時公  
同考驗果有馬步弓箭不能開熟戰陣縮畧  
不知大意素無謀勇應該罷黜者亦就開具  
奏請定奪

三重伍兵以謹團練前件照得近年各營操練  
委的徒事虛文全不精銳一遇有警皆不堪  
用追剿流賊則隨處敗走出征宣大則浪費  
邊儲給事中翟璫所言深切時弊臣等近日  
痛懲宿弊大懼誤國 會官議推左都督劉

暉等預行選練振揚軍威正欲兵將相識有  
警得用伏乞

聖明天語丁寧戒諭劉暉等務要用心揀選嚴加訓  
練中間合行事宜遵照欽奉

勅內事理着實奉行不許因循顧忌致誤大事

四禁占役以實營伍前件查得先為整飭兵備  
事成化十九年十一月初六日該司禮監太  
監懷恩題本部查得京營提督內臣軍伴一  
百名掌營內臣總兵官各六十名坐營官十  
五名把總官六名俱於五軍等三大營取撥

又查得成化三年五月二十八日節該欽奉  
憲宗皇帝聖旨練兵講武是國家最重的事但承平  
日久中間私弊多端有名無實近來將五軍  
三千

神機三大營官軍簡選頭等精壯的分為十二營團  
操次等的仍留三大營操練慮恐日後人不  
知警私弊復生恁兵部使出榜禁約自今坐  
營把總以下官但役占五名以下者降一級  
五名以上者降二級甚者罷職充軍仍發邊  
遠守禦如或容情故縱不舉奏者事發一體

治罪不饒欽此欽遵外今照前因合再為申明役占六名即為五名以上役占一名二名三名四名俱為五名以下俱照前例降級一名二名以上積至六名者各通論從重併數減降數至十名以上此其甚者或罷職或充軍論罪之日取自

聖裁其提督總兵及點軍等官明知前弊容情故縱不即舉奏者事發一體叅究題奉

憲宗皇帝聖旨是恁部裏便將今定事例出榜去營內張掛曉諭欽此已經出榜於各營張掛曉

諭欽遵外今給事中翟瓚奏要查照前例出  
榜曉諭以憑改正遵守合無本部再行申明  
行移各營內外提督等官一體欽遵仍要嚴  
督各坐營把總等官但有役占者通行改正  
遵守舊例若有仍蹈前轍者聽點軍科道官  
訪出指實叅奏

為精兵衛任將官以保障重地事

看得巡按御史王九峯所奏大意謂京師迤南其地  
不為不重原設一十九衛除京操外尚有三萬餘人  
因無立法以致武備廢弛要添設總兵官一員并連

紫荆等關悉聽節制等因無非欲專任將官以興舉武備之意不為無見但查得興州中屯等一十九衛內除保定左等五衛京操官軍存留在衛者見該叅將盧英統領操練外其餘衛分食糧正軍俱各輪班京操止有舍餘軍餘守城操練數亦不多況無月糧多不堪調見該本部議擬題准推舉在京堂上官分投前去京師迤南地方將各衛軍舍餘丁并州縣民兵通行揀選操練其順天及保定等府巡撫都御史俱令專一在於邊關防守內外相應俱有倚託今若於保定添設副總兵一員所管不過見任叅將盧英

之事必須照依前項弘治十八年事例將盧英改調別處萬一新推副總兵猝急未到或雖到號令未得便行軍士聞知叅將盧英更替不服號令盧英因而解體兩相耽誤若將盧英就留在彼協同管事不惟查無舊例又恐官多民擾若就將盧英改充副總兵照依先年韓玉張勇等責任重其事權但盧英見聽都御史臧鳳節制調度防守邊關一旦改陞副將協同行事非惟盧英心有未安抑恐臧鳳或難駕馭反覆叅詳其在此時猝難施行臣等愚見排難解紛固在乎急速計處而隨機應變尤貴乎整暇有序合無



本部行文都御史臧鳳督同盧英照依巡按御史王  
九峯計慮虜患深意用心籌畫加謹隄防務俾封域  
慎固郊畿真安軍務事情便宜施行待候賊情寧息  
本部將所奏添設副總兵事宜另議施行其所奏要  
將保定等處達官軍量行賞勞一節緣彼處達軍委  
的驍勇可用屢有戰功賞未酬勞今欲防禦虜寇必  
須獎勵賞勞庶可得其効力合無行與巡撫等官依  
擬賞勞施行事寧照舊正德十一年七月二十六日  
具題奉

聖旨是這地方達官達舍既曾為國効勞着巡撫都

御史隨宜賞勞他欽此

為修舉近郊武備事

臣等議得京師東西關陞原已設有總兵叅將守備等官又有都御史臧鳳本李瓚專一整飭近又遣都督傅凱張椿都指揮李琮分路防守頗為有備但郊畿近地雖係臧鳳李瓚兼領巡撫見今各官專在沿邊關口往來巡歷顧理不周今年七月十三日虜賊七萬餘騎離宣府城不遠剽掠縱賊四散搶殺白羊口并西山齋堂等處去京不及一日之程俱報聲息可見點虜有輕視邊鎮之意近聞虜營尚在近邊住牧

未見遠退秋高馬肥大舉深入難保必無近郊武備  
急宜修舉合無本部會官推舉在京堂上素有才望  
着實幹事官四員上請

簡命二員一員前去保定具定順德大名廣平五府  
一員就在順天并去永平河間二府專一整飭兵備  
嚴督所在分守守備兵備府衛等官除臧鳳李璿所  
管在關人馬防守民壯并保定叅將盧英所領官軍  
及盧鏜等見選達官軍仍聽臧鳳等管束調用不必  
干預外其各衛所官軍舍餘并各府州縣原有民兵  
及平素應充快手等項驍勇人役悉聽選委謀勇官

員用心揀選如法操練若府衛州縣掌印官內有才堪熟領武事者就令不妨原職兼管選練事尤易舉其官軍舍餘并民兵已經精選造定文冊仍令各在原衛所府州縣操守遇整剋期調集方為省便若通州一帶各馬房地方密邇古北口等處邊關真定遼山州縣密邇龍泉關等處邊關應該相視要害屯聚官軍民兵以防不測就便從長計議調集防守中間置買什物供給口糧等項本部所擬該載不盡一應事宜悉聽本官便宜施行應具奏者仍須奏請定奪前項軍餘民兵雖為專一防禦虜寇若遇地方盜賊

竊發乘機作亂就便緝捕撫安干碍城池亦聽督修  
完固凡有合行事宜務須慎重詳審既在武備着實  
修舉又須處置得宜民無擾害斯稱委任如或鹵莽  
從事致有乖方顧此失彼逼民逃移咎有所歸事寧  
具奏回京正德十一年七月二十二日具題本月二  
十三日奉

聖旨是都依擬行堪修舉近郊武備的便各會推兩  
員來看欽此會同太子太傅成國公臣朱輔等太子  
太保吏部尚書臣陸完等從公推舉得刑部右侍郎  
馮清都察院右副都御史金獻民俱堪順天等府工

部右侍郎兼都察院左僉都御史趙璜工部右侍郎  
俞琳俱堪保定等府各整飭武備伏乞

聖明於內各

簡命一員照依該部原擬責任請

勅前去欽遵行事如用馮清俞琳仍各量兼憲職合  
用巡視整飭武備關防各壹體行移禮部鑄造給用  
符驗各一道及書吏家人各二名照例查行關領應  
付正德十一年七月二十五日具題本月二十七日奉  
聖旨是趙璜着整飭順天等三府武備俞琳兼都察  
院右僉都御史整飭保定等五府武備各寫勅與他

欽此

為捉獲姦細事

看得紫荊關捉獲姦細人李法順供說猴兒李指揮差來打細要於八月十五日大勢達賊往南搶虜等情臣等覆審本犯所說俱係實情切詳宣大二鎮并山西三關紫荊居庸密雲寧關俱各原舊設有邊備近日又節次議擬具奏整兵防禦但近年北虜強梁又被猴兒李指揮誘引設使果如姦細所言八月十五日擁衆分道入寇邊鎮各該將臣又如潘浩等束手無策任其縱橫搶殺近裏一帶關隘亦如白羊口

守備指揮丘泰等不能阻殺縱放入口又恐整飭邊  
備都御史臧鳳李瓚計慮不早號令不嚴以致各口  
官軍失守被賊侵入關內倉卒之際將何支持況今  
京營人馬臣等節次具奏選將練兵尚未舉行且據  
李法順所供八月十五日即欲入寇事在緊急不可  
不慮合無本部將解到姦細李法順送都察院收問  
各另分投馬上差人齎文交與平虜將軍總兵官劉  
輝等及宣大二鎮總兵官時源潘浩等并鎮守薊州  
山西副總兵戴欽郭錦等整飭邊備都御史臧鳳李  
瓚等各照節次題准并節奉



勅旨事理比常十分用心整飭調集官軍多方哨探相機戰守如有因循怠忽致悞事機罪不輕貸再乞勅提督團營新寧伯譚祐等上緊照依本部原擬整餉人馬操練聽候及請

勅戶部多方區畫糧草以備供給正德十一年七月二十八日具題本月二十九日奉

聖旨是都依擬行欽此

為傳奉事

正德十一年七月二十九日早該司禮監太監賴義傳奉

聖旨團營西官廳官軍出差數多見今各邊累奏聲  
息不絕著兵部同許泰等會議何項人馬以備自警  
應用欽此欽遵臣等會同監督團營西官廳左都督  
許泰等議得五軍三千

神機三大營并團營查出本年七月分官軍除差占  
出哨防守等項一萬六千七百三十二員名做工四  
萬八千八百八員名外五軍營見在京衛官軍及殫  
忠効義二營舍餘共四千六百七十五員名外衛官  
軍一千二百四十九員名三千營見在京衛官軍二  
千一百六十九員名外衛軍六十七員名

神機營見在京衛官軍四千五十二員名外衛官軍  
一百九十二員名團營見在京衛官軍四萬六千三  
百三十三員名外衛見在一千三十三員名以上三  
大營并團營見在官軍舍餘共五萬九千七百七十  
員名俱可以備有警應用除團營見選騎兵一萬五  
千步兵一萬員名推舉將官管領操練聽用外其餘  
官軍并三大營見在官軍及五軍營內殫忠効義二  
營舍餘合無乞

勅各該提督官各整點操練聽候調用合行事宜各  
另議定奪正德十一年八月初二日具題本月初五

日奉

聖旨是這官軍并舍餘便者各該提督官整點齊備  
聽候調用欽此

為捉獲姦細事

看得整飭邊備都御史李瓚奏解捉獲姦細王得來  
等三名合無將各犯送法司究問明白照依律例議  
擬奏請發落原摺獲姦細百戶張銳千戶耿宣行令  
分守指揮孫墮先行賞勞本部查例具奏陞賞及照  
姦細王得來說要八月十五日月圓大舉人馬前來  
隆慶州永寧等處搶掠等情合無本部馬上差人齎

文交與侍郎丁鳳火速會同太監張忠左都督劉暉  
計議禦虜方畧布置設伏或截其衝或邀其歸務使  
隆慶一帶地方不受殘害虜賊大遭剝削仍通行宣  
大山西薊州保定各該鎮巡等官一體整飭防禦嚴  
加盤詰但有捉獲姦細牢固解京原拏姦細人員先  
行賞勞待後問完本部議擬奏請從重陞賞若有故  
不用心縱放姦細出入往來事發供招經過地方官  
員通行提問重罪正德十一年八月初四日具題本  
月初六日奉

聖旨是這姦細送法司究問明白來說張銳耿宣着

先行賞勞再議陞賞整飭防禦等項事宜都依擬行  
欽此

為急處邊務事

看得太監張忠侍郎丁鳳左都督劉暉會本具奏捉  
獲姦細王得方等說稱達子頭兒郭那顏要到八月  
間月兒圓時還來往南搶掠大同迤西地方空闊兵  
勢單寡不能支持臣等應援不及誤事匪輕再選謀  
勇將官添調人馬發來大同與總兵官時源會合截  
殺一節具見各官同心協力計慮深遠但要另選將  
官添調人馬誠恐緩不及事合無本部行文提督都

御史彭澤會同東西二路總兵官并遊擊將軍陶珣等計議查看如果東西二路關隘哨探虜賊離遠都御史李瓚臧鳳并總兵官戴欽遊擊李琮及傅鎰張安張椿等各能防禦將今次出征人馬量撥精銳於紫荆關住劄及將原撥守關盧鏜等所統達軍一同在關整點犒勞一遇飛報大勢達賊西入蔚州一帶搶掠逼近倒馬紫荆等關地方就聽都御史彭澤等運謀設策一面會委臧鳳嚴守關隘一面督領堪戰官軍出口相機截殺應該與劉畔時源等人馬會合策應亦聽從宜施行若哨探虜賊往東隆慶一帶搶

掠紫荊關外報無聲息仍於東路一帶關隘防禦悉  
聽都御史彭澤等計議便宜施行本部再差人馬上  
齎文交與張忠丁鳳劉暉設法遠為哨探務要預知  
賊情向往如賊勢東行則備其東照依原擬按伏邀  
擊若賊西趨大同蔚州地方則擊其西縱不能阻其  
來亦可以截其歸仍預設健卒快馬一遇有警四散  
傳報各關隘口通知本部再差人馬上齎文交與馬  
錫王憲時源羅籬李鉞郭錦等各整所部人馬遇警  
會合截殺務使聲勢聯絡彼此應援不許自分彼此  
失誤事機及看奏內開稱姦細王得方等供稱到於



德勝門水關迤西娘娘廟馬善友家住了九日買針一百仍舊出境一節係于姦細潛入京城事理合無行文錦衣衛并巡城御史嚴督五城兵馬司各照地方排門粉壁挨查但係流移潛住之人俱徑送順天府解發原籍收查發落審出來厯不明人犯送法司究問發遣伏乞

聖裁正德十一年八月初十日具題奉

聖旨是五城地方有流移潛住并來厯不明之人着錦衣衛巡城御史并兵馬司用心體訪處置其餘事宜依擬行欽此

為傳奉事

議得京城內外先年設立五城兵馬指揮司職專禦風火察姦盜及錦衣衛官校巡警夜禁緝捕盜賊監察御史巡城禁革姦弊在外通州良鄉等處各設有軍衛委官巡捕其後通州等處又設分守涿州良鄉又設守備又三年一次差御史錦衣衛官分路巡捕弘治元年為因盜賊生發奏准於三千營選撥官軍一百員名於彰義門外義井兒及良鄉縣并清河高碑店四處每處二十五名隄備盜賊正德初年京城內添設把總官二員委官八員各分地方每委官一

員管領馬軍二十四名步軍二十五名共四百員名  
京城外添設把總官二員每員領有馬官軍五十員  
名委官七員每員管領馬軍六十名共四百二十名  
正德十年會議京城內每委官一員各添馬軍二十  
五名步軍二十五名共軍七百九十二名馬四百匹  
京城外每委官一員各添一百名共軍一千一百二  
十名馬一千一百二十匹把總并委官俱一年一換  
城外把總該領官軍全給盔甲海巡馬軍給與一半  
八十副今年又奏差工部右侍郎趙璜專一整飭武  
備挑選河間等衛舍餘交與分守通州都指揮袁傑

及涿州守備崔澄亦添撥官軍各給馬匹嚴謹巡捕壩上良鄉等處正係袁傑崔澄等該管地方立法不為不密責任不為不專但京城內外人烟輳集遊食者多壩上良鄉等處軍民艱窘差役繁重以此盜賊隨捕隨發難得盡絕自去年本部會官議添巡捕官軍數多定擬條格賞罰嚴明又給與盔甲火器馬匹草料以此一年之間把總官捉獲強盜二百餘名錦衣衛坐委官校及各該緝事衙門亦皆緝捕數多柰何世情艱難財重命輕致厯

聖慮屢降

明旨着落官軍用心撲拏未得寧息今又奉

旨令臣等從長議處停當奏來定奪臣等愚見若欲

從長計議處置停當必先撫恤軍民輕徭薄賦人得

安生則盜賊自少前項節年議處捕盜事宜已極周

密今若不先撫安專立嚴法搜捉擒捕誠恐法網太

密致有激變前代漢武帝時為因山東盜起遣官衣

繡持節發兵擊斬至萬餘級盜賊愈滋至不可禁正

德四年添設巡捕御史帶領家眷專督捕盜法網嚴

密賊勢愈熾兇惡之徒棄機倡亂肆行劫掠至動邊

軍入剿逾年始平是其明驗以故捕盜之法固不可

寬縱亦不可太嚴今將弭盜根本及先年捕盜事件  
開查明白合無照依弘治元年事例本部會同錦衣  
衛并六科十三道掌印官再行計議應否施行奏請  
定奪正德十一年十二月十三日具題本月十五日奉  
聖旨是這先年捕盜事宜恁每還會官議處了來說  
欽此欽遵今將原擬捕盜事宜開立前件會議明白  
及另議合行事宜逐一開款伏乞

聖裁正德十一年十二月二十八日具題奉

聖旨高謙盛瑾孫浩郊文各着把總巡捕其餘准議  
欽此

計開

兵部原擬捕盜事件

一弭盜根本近年捉獲盜賊多係當差軍民  
原無產業又被管軍管民官員不肯撫恤  
惟知科害以致艱窘衣食不給饑寒切身  
甘心為盜視死如歸合無請降

勅旨令各營并在京各衛所順天府及在外直隸保  
定等府州縣衛所管軍管民官員今後非奉  
朝廷明文一夫不許擅起一錢不許擅科敢有故違  
科害逼迫軍民失所許被害之人指實陳

告治以重罪前件依擬

一大明會典一款凡地方軍匠人等舊例令各家俱於門前置粉壁一面開寫本家籍貫人口身役營伍并寫不敢窩藏逃軍逃匠囚徒盜賊等項以憑挨究今查前例日久廢弛以致盜賊潛藏無所警畏合再申明置寫挨究但有犯者照依律例究問解發前件依擬不拘內外官員及勢要之家一體挨查但有一應來厯不明及不係官員軍民匠籍之人俱不許容留潛住如有



倚勢窩藏不報挨查者該城兵馬司具呈  
錦衣衛并巡城御史叅奏處治

一京城內外人煙輳集去處盜賊強劫皆由  
夜禁不嚴巡捕不謹所致合無今後但有  
強盜明火持杖強劫人家財物出入自由  
火甲不行傳報救護巡捕官軍不在地方  
巡歷追捕將巡捕官軍并該管兵馬司官  
吏弓手火甲人等俱叅送刑部問罪若地  
方被盜火甲知覺傳報救護及巡捕官軍  
見在地方巡歷遇賊追捕者不在此例前

件依擬

一弘治元年百戶王敏建言要於京城內外  
小巷路口置立柵欄夜間關閉本部會管  
計議題准先於城內關廂試驗令巡城御  
史督同兵馬司計算工程先儘財主勸出  
銀兩如法成造果為有益城內另擬後因  
兵馬司官奉行無法一槩科取騷擾地方  
又行禁止其已修完柵欄亦不如法不久  
損壞今照京城之內大街小巷不止一處  
巡捕官軍止有七百餘名未免巡歷不周

一聞有盜昏夜追趕小街曲巷輒被藏匿  
合無除寬街大路不必置立外但係小街  
巷口相應設門去處各置立門柵遇夜關  
閉如遇追逐盜賊不得委曲隱藏本部仍  
委官一員會同巡城御史督同兵馬司官  
相視計議如法修置合用工料勸倩本巷  
得過之家情願出辦不許強逼科害致生  
怨議別有良法具奏定奪前件先年已行  
未免騷擾地方今不必舉行

一京城外東北巡捕見有把總都指揮楊昇

西南巡捕見有把總都指揮王佐通州一帶見有分守都指揮袁傑涿州一帶見有守備都指揮崔澄各有原設巡捕官軍壩上良鄉等處皆是各官該管地方又該工部侍郎趙璜奏准許令袁傑帶領河間等衛舍餘五百員名太僕寺撥馬五百匹又行令崔澄揀選官軍舍餘五百四十二員名太僕寺撥與馬一百五十匹盔甲腰刀選給三百副合無本部再行整飭武備右侍郎趙璜并巡撫都御史李瓚嚴督袁傑

崔澄等本部督令楊昂王佐等各照地方  
務要比常加謹用心緝捕如遇追襲強賊  
走出詎管地方亦聽乘機掩襲會合剿捕  
但不許一槩搜捕妄拏平人驚疑地方事  
發從重叅究前件依擬

一各巡捕官軍捕獲強盜或地方失事正德  
十年會議賞罰條例俱係暫行近已革去  
除陞賞遵照舊例施行及京城內外失盜  
照依前例查明送問外但係通州良鄉壩  
上等處在外地方被盜強劫失事仍照正

德十年會議事例把總官委官一年之內  
該管地方被強盜擄馬打劫一次全無拏  
獲委官積至五起以上降一級十起以上  
降二級不及數少委官每一起罰俸兩箇  
月分守守備把總官每一起罰俸一箇月  
捕盜該陞者照級准贖其罪庶使人心知  
警言不敢玩怠前件依擬每年終一次兵部  
查奏

今另議合行事宜

一見今京城內東西二邊把總巡捕官下共

有馬步官軍八百員名京城外東北西南  
把總巡捕官下共有有馬官軍一千一百  
二十員名但京城內外地方廣闊街巷數  
多巡邏不週合於城內每總添撥步軍一  
百名城外每總添撥步軍一百五十名共  
五百名與原撥官軍分作兩班派定地方  
輪流巡邏不許私役賣放

見委城內東邊把總巡捕都指揮章縉西  
邊把總巡捕指揮謝素城外東北把總巡  
捕都指揮楊昂城外西南把總巡捕都指

揮王佐俱各謀勇未聞難責成效俱合更  
換今不為常例會推得原委西南巡捕都  
指揮高謙堪替楊昂原委城外巡捕都指  
揮盛瑾堪替王佐指揮孫浩堪替章縉指  
揮郊文堪聽謝素伏乞

聖裁候命下之日仍令各官把總巡捕以後事故仍  
照舊例兵部委用

一捕盜陞賞事例必須申明通行庶使人知  
激勸查得近談兵部議得合無今後務要  
所獲強盜果係聚至數十人之上兇惡顯



著委曾相與對敵人所共知行該地方覆  
查得實者方准照例陞級其餘緝捕零賊  
并買求他人所獲輾數覘作兇惡勢衆對  
陣擒獲者俱不許陞級等因正德九年七  
月初四日節詠奉

聖旨是今後拏獲強賊果係聚衆數十人以上兇惡  
顯著曾經對敵人所共知覆勘是實的方  
許照例陞級不許將緝捕零賊并計買覘  
輾的一槩朦朧奏撥欽此又查得兵部會  
官議得南北直隸山東河南江西等處遇

有官兵人等擒斬賊級若與賊對敵就陣擒斬有名劇賊一名願不願陞級者賞銀三十兩擒斬隨從強賊者每名願賞銀十五兩陣亡者重加優恤若不係對敵止是緝捕強盜者每名願賞銀十兩若擒獲偽稱名號首賊者又不拘定數目聽候各官斟酌加賞其不係應捕人員一體給賞等因正德六年三月十七日兵部等衙門尚書等官王敞等具題本月十九日奉

聖旨是這賞罰事例既議擬停當都准行通行出榜

省諭各該地方官員人等知道欽此。前例合再申明通行。若京城內外把總巡捕官及在外分守守備等官。遇有擒捕緝捕強賊查勘。是實照依前例陞賞。有能運謀設法擒捕強賊數多。地方寧靖功蹟顯著者。聽巡撫按官奏保陞級。兵部遇有相應員缺。不次推用。

一大明律內一款。凡強盜窩主造意身雖不行。但分贓者斬。若不行又不分贓者杖一百。流三千里。共謀者行而不分贓及分贓

而不行皆斬若不行又不分贓者杖一百  
欽此又查得問刑事例內一款

皇親功臣管莊家僕佃戶人等勾引外處來歷不明  
之人窩藏為盜坐家分贓者問發邊衛充  
軍其該管家長叅究治罪又一款知強竊  
盜贓而接買受寄者馬羸等畜至三頭匹  
以上銀貨坐贓至滿貫者俱問罪不分初  
再犯枷號一箇月發落若三犯以上不拘  
贓數多寡與知強盜後而分贓至滿貫者  
俱免枷號發邊衛充軍竊詳立法之意止

東江考言卷之二  
欲禁治窩藏盜賊之家及接買受寄之人  
不敢窩藏寄買則盜賊無所藏匿寄放易  
得事發但今盜賊事發到官窩主及接買  
受寄之人多從寬發落以致人無警畏合  
無兵部轉行法司今後盜賊窩主并接買  
受寄盜贓人犯務要照依律例從重問擬  
枷號充軍等項發落

一錦衣衛原有領馬校尉一百名務要不時  
往來各該地方督同兵馬火甲人等緝捕  
盜賊遇有強盜打劫會合巡捕官軍併力

擒捕如有誤事聽本衛提督官比較處治

### 為軍務事

查得在京差出將官有例奏帶叅隨人等其在外邊方調取策應叅將等官原無奏帶事例今蕭澤奏帶錦衣等衛官旗軍舍餘五十八員名違例過多中間多係應支廩給人數見今宣府錢糧十分缺乏若准奏帶前去坐支廩給口糧難為戶部供給況若遇賊縱使帶去官員着實臨陣對敵亦必有冒報功次之疑合無照依陝西延綏等處徵調遊奇兵馬事例俱不准帶惟復量准帶十餘名跟隨應用伏乞

聖裁正德十二年七月初八日具題奉

聖上還准他帶去欽此

為水患異常輒設兵備等官預防盜賊事

議得事有常變患當預防今年水災異常五穀不收  
目下人民缺食過冬及春青黃不接必不聊生聚集  
為盜勢所不免合無查照近年事例直隸大名等府  
山東武定州等處各輒設兵備官一員行移吏部推  
舉風力才幹之人不拘僉事副使請

勅專一提督操練官軍民快防捕盜賊保安地方前  
項兵備按察司官雖各分定地方專管捕盜但恐盜

賊一時蜂起聚眾延蔓兵力寡弱不能防禦除南直  
隸河南另議外合無於直隸河間府地方暫設總兵  
官一員鎮守照例請

勅關給

符驗旗牌就於河間三衛并保定等衛不拘官軍舍  
餘軍餘并達舍軍餘內挑選精銳官軍二千員名撥  
給馬匹盔甲等項如法操練振揚威武彈壓奸頑除  
河間府地方強賊徑自剿捕外其保定等七府并山  
東地方盜賊生發不多聽本處官司自行剿捕但係  
聚眾三十人以上乘坐馬匹懸帶弓箭勢極兇惡本



處官司力不能制一面申報本部具奏處置一面徑直飛報鎮守河間總兵官酌量事勢差撥官軍設法追剿務要即時得獲毋致滋蔓合用行糧草料行移戶部議奏撥給若河間府倉場無積令無行令各官軍於德州倉內關支及談關料豆亦於談納德州倉粟米內改撥支給庶為便益候

命下之日本部會官推舉謀勇威望素著官員上請簡用令其上緊前去庶事有預處盜患可弭前項兵備并鎮守官俱候明年麥熟盜息民安之日具奏裁革臣等再議得修舉武備固可龍服奸頑賑濟無恤

尤能培植根本伏望

皇上節財省費布德施仁應有賑恤之典特

命所司及早舉行地方幸甚正德十二年八月初六日具題奉

聖旨是這地方鎮守將官并兵備官俱暫准添設欽此欽遵除兵備官吏部照例推用外臣等會官推舉得右都督郤永謀勇素聞威靈舊著都督同知張璽曾經戰陣軍功得陞伏乞

聖明於內

簡命一員充總兵官鎮守河間等處地方兵部照例

請

勅令其上緊前去操練官軍振揚威武彈壓奸頑緝捕盜賊其控制地方挑選官軍并合用

符驗旗牌行糧料草等項悉照兵部原擬施行正德十二年八月十四日具題奉

聖旨是張爾素著充總兵官鎮守河間等處地方寫勅與他欽此

為申明捕盜禁例事

今將捕盜禁例事宜查議明白開立前件伏乞聖裁合無本部刊印榜文通行給發山東直隸地方

司府州縣衛所兵備等衙門各於人煙輳集去處常川張掛曉諭庶使法令明布人不敢犯正德十二年八月二十日具題奉

聖旨是這地方捕盜事宜恁每既開議明白着各該鎮守兵備等官依擬行還給榜張掛曉諭欽此

計開

一今年為因水災重大誠恐饑民聚衆劫掠河間府地方暫設總兵官一員領軍鎮守及武定州大名府暫設按察司官各一員整飭兵備與各處見有兵備等官專為追捕見今事

發為盜之人其先年被賊脅從招撫復業之人並不追究敢有奸詐之徒生事搜求乘機詐害者許被害之人赴所在官司陳告即與受理將生事詐害之人治以重罪若官司故不受理致令一槩驚疑罪有所歸

一強盜未發自首依律免罪若能捕獲同伴強盜送官亦得免罪又依常人一體給賞

一捕獲強盜照例每名賞銀十兩若係二三人以上同捕獲者分別首從酌量分給領軍官并巡捕官所管旗軍民快人等每捕獲強盜

一名賞銀一兩總兵官部下并兵備按察司  
官所管地方捕獲強盜一百名以上賞紵絲  
二表裏銀二十兩二百名以上奏

請定奪

一談用賞賜銀兩各於所在官庫贓罰銀兩內  
支給如無見在銀兩聽將囚人贖罪紙米折  
納支給其見獲盜贓內有無主應該入官者  
聽總兵官并兵備按察司官從宜給賞捕盜  
功多及把總巡捕等官內謀勇出衆之人以  
示激勸

一鎮守河間總兵官所領官軍編成隊伍遇有河間府所屬地方強盜生發徑自設法擒捕其順天保定等府所屬地方盜賊生發不多聽本處官司自行剿捕但係聚衆三十人以上乘坐馬匹懸帶弓箭勢極兇惡本處官司力不能制一面申報兵部具奏處置一面徑直飛報鎮守河間總兵官酌量賊情輕重或發一二隊或發十餘隊火速前去追剿每隊於河間府出給印信勘合一張開寫官軍花名收執經過止宿去處照例應付行糧料草

若遇追賊緊急各該官司量備包草乾料并熟食應付不許遲誤其捕盜管軍亦要預先自備基炒以備緊急追賊之用

一新設總兵官并新舊兵備按察司官務要號令嚴肅鈴束所部秋毫無犯專在弭盜安民不許干預別事如果盜息民安方稱委任如或誅求放肆地方受害盜賊蜂起不能禁治聽巡撫巡按官并本部指實糾奏

為強盜聚衆百人以上拒敵殺傷官軍事

看得前項強盜係是聚衆百人以上張打旗號騎坐



馬匹持執兇器拒敵官軍劫奪囚犯重情除行鎮守  
河間總兵官都督同知張壘照依本部題准事理統  
領所部官軍前去剿捕外臣等議得今年河間等處  
水災重大百姓十分艱難不獨今報前項賊情誠恐  
以後各處盜賊蜂起深為可慮雖設有總兵官張壘  
所統官軍不過二千員名况行糧草料并盔甲器械  
未曾處置支給已經本部議處具題未奉

明旨緣官軍無糧馬匹無料又無盔甲器械豈能禦  
盜近年劉六等賊作亂因處置遲慢致成大患伏望  
宸斷速將臣等所議處置糧草軍器等項事件依擬

施行庶不誤事再乞

勅巡撫保定都御史李瓚將叅將盧英所領官軍二千七百八十五員名并管領達官都指揮盧鏜指揮安欽等原選達官軍舍餘四百五十六員名於內揀選驍勇精壯之人作急從宜處給馬匹盔甲器械行糧草料作養銳氣令於該管地方不時巡邏遇有報到強賊即便依律會合剿捕再乞

勅整飭薊州都御史臧鳳督委兵備副使王珪將各州縣原有民壯快手等項人役但係慣能拏賊之人挑選團聚亦就從宜給與盔甲器械整點齊備但有

賊情運謀設策相機剿捕前項各詠捕盜官軍惟以  
預盜為主亦不許分外生事激變地方再照律例不  
許隱蔽賊情本部屢經申明通行遵守豈期所在官  
司玩法畧不遵依巡撫官亦不能振揚舉行如前賊  
聚衆行劫已非一日京城巡捕官解恒報來其固安  
等縣官員如罔聞知若不重加懲治何以警戒其餘  
合無行令都御史臧鳳查勘前賊生發出入去處詠  
管地方官員即時拏問擬罪明白監候奏請發落仍  
再通行各管地方申明曉諭以後不許似前隱蔽如  
有故違一體究治再行各詠巡按御史但有賊情即

時具奏隱匿官員叅奏提問正德十三年正月初三日具題奉

聖旨是這強賊聚集人衆早宜撲滅張璽官軍糧草軍器等項已有旨了着上緊依擬揀選遇有報到強賊即便會合剿捕不許互相推調各州縣民快人役也着王玘挑選團聚加謹防禦各該巡撫都御史務要嚴督所屬振揚威武不許因循怠玩致令滋蔓山東河南附近去處兵備守備等官都着用心把截隱殺賊情不行奏報的本當拏問查勘明白住了俸待捕盜有功來說恁部裏還通行申明與他們知道欽

此

為黨惡強賊披帶盔甲懸帶弓刀戰努長鎗騎  
坐馬匹聚衆中途劫囚搶奪捕盜人役馬匹等  
事

看得整飭天津兵備副使胡文璧奏稱劇賊張鉞等  
住居羽林前衛屯堡倚恃京衛往往結黨夤緣劫掠  
人財非止一次今乃恣肆率衆拒敵劫奪被獲夥賊  
勢衆兇惡若不早為撲滅誠恐滋蔓釀成大患貽害  
匪輕乞要行令該衛親管官員設法擒捕或差官調  
度人馬撲滅盡絕以靖地方一節近年劉六劉七齊

考名等賊亦係近京霸州等處屯住軍民初起甚微  
為因官司隱匿玩忽遂致釀成大患今副使胡文璧  
要將劇賊張鉞等早為撲滅誠為有見但要行令羽  
林前衛親管官員設法擒捕難以施行查得見設鎮  
守河間等處總兵官張墮本部原擬專為預防饑荒  
群盜蜂起而設張鉞等賊正宜責成本官設法督捕  
合無本部行文諒府馬上差人齎文交與總兵官張  
墮選委驍勇智謀官員各量帶官軍分投前去東安  
等縣公同諒縣官查訪敬生屯居住知因之人用為  
鄉道運謀設法尋覓風路務要將強賊張鉞等一起

賊犯日下捕獲以靖地方有功之人照例陞賞仍通行巡撫都御史李瓚臧鳳嚴督撫屬地方軍衛有司及分守兵備守備等官一體用心挨拏不許自分彼此致有奔逸事發查究重罪其差出捕盜官員令張璽叮嚀分付所至去處止以襲捕見發強賊張鉞等為事不許乘機搜求別事驚擾地方及指稱追贓妄拏平人事發亦治重罪總兵官張璽亦難辭責正德十三年正月初三日具題奉

聖旨是這地方賊盜着總兵官張璽巡撫都御史李瓚臧鳳各依擬上緊嚴督所屬用心襲捕務在日下

盡絕不許自分彼此致令奔逸有功之人照例陞賞  
欽此

為盜賊生發事

議得盜賊初起其端甚微以後猖獗為患甚大蓋因  
今年水災百姓十分艱難一人扇動千百成群最為  
容易賊盜中間豈無奸雄窺見

聖駕巡邊精兵俱帶出口京營人馬不敢擅發以此  
肆志猖獗萬一聚眾凌逼京師內外驚擾各衙門官  
束手無措咎將誰歸仰惟

皇上英明威武胡虜數萬畏威遠避最爾盜賊撲滅



何難伏望

聖駕還京簡命謀勇將官量帶西官廳精銳官軍分道四出相機剿捕盜賊悉平地方寧靖則

皇上神功武烈天下傳誦臣等不勝忻願祝頌之至  
正德十三年正月初三日具題奉

聖旨是欽此

為弭盜安民事

照得先該本部為因近年各該官司隱蔽賊情不行督捕以致滋蔓釀成大患以此節次議奏申明律例但有賊盜生發隨即申報緝捕不許隱匿坐視又因

今年河間等處災傷慮恐人民缺食聚衆為盜又奏  
准添設總兵官選揀官軍二千員名鎮守地方近訪  
得蘆溝橋迤南良鄉涿州一帶地方強賊聚衆劫掠  
及武清固安永平一帶地方亦有盜賊生發各該官  
司既不火速申奏又不設法督拏若不通行查究何  
以弭患將來及照巡撫都御史專以弭盜安民為職  
未聞申嚴號令禁防盜賊亦難辭責合無請

勅巡撫都御史臧鳳李瓚嚴督軍衛有司并兵備守  
備分守等官比常十分加謹整搦應捕官軍不時往  
來該管地方巡邏如遇響馬強賊務要跟襲擒捕不

必拘定地方自分彼此致賊脫走仍要互相傳報會  
合剿捕其巡捕官軍合用行糧料草馬匹軍器巡撫  
官務要用心區畫撥補應付必先養其銳氣庶可責  
其效力各官內有謀勇廉幹者以禮將奏勞闡首害人  
地方屢次失事又隱匿不報者叅奏罷黜再乞

勅鎮守河間總兵官張鹵務要委用領軍頭目得人  
選練捕盜官軍有法遵依原議但遇報到賊情聚衆  
三十人以上量撥官軍追襲剿捕出給勘合照例應  
付行糧料草務使威武振揚盜賊屏息不許委用非  
人縱賊不拏或別生事端騷擾州縣甚至妄拏平人

追取贓物驚疑軍民激成他變咎必有歸仍行各該  
巡按御史從公訪察果有前弊不分巡撫鎮守分守  
兵備守備等官具實奏聞區處及照京城內外近日  
米價騰貴乞食饑民徧滿街巷乘機搶奪賊盜漸多  
合無請

勅錦衣衛嚴督本衛該管地方官員旗校并五城兵  
馬司嚴謹夜禁防察奸宄及行團營將原撥巡捕官  
軍馬匹盛甲逐一查點內有老弱瘦病損壞不堪者  
作急更換撥補嚴督把總巡捕都指揮比常加謹晝  
夜來往該管地方巡捕不許怠忽臣等又議得荒年

禁盜理固當然但恐軍民迫於饑寒為盜者眾將不勝誅加以捕盜官員恐罪及身過於搜求羅織以致法網太密盜無所容激成他變至不能禁豈非臣等謀慮不審之過罪將焉逭伏望

皇上長慮却顧弭患未然急降

詔旨先將畿內饑饉艱難地方軍民一應征料不分新舊俱暫停徵待明年麥熟再議征收敢有故違逼徵者聽巡按御史將應問人犯就便拏問其餘不係艱難饑饉地方不在此例然後酌量財用多寡再施賑濟之令京城內外乞食饑民亦乞處分量為賑給

餓死者官為掩埋毋令暴露即今米價甚貴或預支月糧或和買平糴或別有良法早為議處庶可以弭京城內外盜賊之患前項賑恤事宜乞

勅戶部查例奏請施行正德十三年正月初四日具題奉

聖旨是這地方盜賊生發各該巡撫及鎮守官不行設法防禦好生誤事且不查究便着上緊嚴督所屬互相傳報用心緝捕併力追剿不許自分彼此怠玩故縱致生他變罪有所歸其餘俱依擬行欽此

為下情乞憐休息地方告乏軍餉等事

看得叅將蕭澤呈稱遼東官軍舊歲四月內調往宣  
大地方殺賊將及一年見在涿州等處住劄委的離  
家日久衣鞋破壞地方盜賊稍寧錢糧匱乏乞要疎  
放回家休息一節臣等議得各邊軍士無事休息得  
所有事方得其用若暴兵露師一年在外必然疲困  
遇賊不能奮勇攻戰合無請

勅一道齎付叅將蕭澤將原領人馬帶回遼東暫放  
休息置辦軍裝完日仍照本部前擬於遼東地方團  
聚操練聽候有警調取殺賊其涿州霸州等處地方  
盜賊稍寧合行鎮守河間等處總兵官張璠等如遇

盜賊再起照前督捕防禦正德十三年二月初二日  
具題未奉有

旨

為暫設提督捕盜官員防禦盜賊事

今將

聖駕巡邊京城該行事宜開具款目議擬明白伏乞  
聖裁正德十三年六月二十六日具題奉

聖旨是提督捕盜官遇有應議事宜着於團營西官  
廳會同兵部從長議處施行其該用官軍張忠朱泰  
着各領一千五百員名王憲於團營內撥與二百員



名桂勇賈鑑還各照他原營官軍數目領用欽此

計開

一提督捕盜官遇有應該捕盜事宜必須會議  
合無於鎮國府或別有相應衙門會議行事  
伏乞

聖明定奪

一提督官該用官軍并左右叅將該領官軍伏  
乞

欽定數目行令各官照數揀選操練聽用

一選官捕盜官軍合用盔甲軍器馬匹草料并

一應事宜聽提督官計議照例關領支給應具奏者奏請定奪

一京城內外把總巡捕官軍聽提督官調度節制遇有賊情即時稟報

一京城內外窩藏強盜及奸細若一應人等有能緝訪得實密切赴提督官處告報因而得獲強盜一名者賞銀十五兩獲奸細一名者賞銀五十兩

一賞報事人合用銀兩如有追出無主一應盜贓准折給賞若無盜贓於太僕寺收貯缺官

皂隸草場地租等項銀內支給

一提督捕盜官遇有京城內外報到賊情運謀設法量賊多寡摘撥官軍相機剿捕或分差把總等官或差委將親自統領前去俱隨宜施行

一提督官差遣官當平一百名以下出百里之外追賊赴督理軍餉侍郎俟觀處填寫勘合給付齎執經過官口照例應付將訣支行糧官為煮辦熟食及將訣支草料錫細煮熟打包以便應付易於追賊仍將前項緣由勘合

內明白填寫使知遵守

一直隸河南山東等處地方遇有報到草賊生發聚衆數百人之上本處官司不能擒捕本部臨時議擬奏請命提督等官統兵征剿請勅侍郎侯觀隨軍督理軍餉及請

勅所在巡按御史隨軍紀功其在京城外百里之內緝捕盜賊得獲送兵部轉送法司問招明白依律議罪發落回報兵部類總照例議擬陞賞

一前項暫設提督捕盜官員候京城內外及直

隸山東河南等處地方盜息民安之日具奏  
裁革各照舊管事

為捉獲積年糾眾逼近京城殺人放火大肆兇  
惡有名劇賊事

叅照賊首王琦本以京縣編民非由饑寒所迫乃敢  
不畏

國法肆意行兇糾合賊首趙祥申黨頭李鉞趙雲劉  
堂吳風子等流劫涿州良鄉房山固安一帶地方殺  
人放火劫庫劫因靡所不為又曾白晝擺列馬隊前  
來宣武門外菜市劫取人財官軍追襲而敢拒捕殺

傷禁兵搜捉而敢尙洋不避本部先因各賊生發地方饑荒慮恐乘機倡亂釀成大患節次議奏督調總兵官張璽統領河間官軍剿捕又奉

旨發遼東叅將蕭澤人馬住劄涿州等處餘黨多已就擒賊首尚未得獲邇者復議發西官廳人馬防禦及通行緝事衙門各該巡撫都御史督委官兵會合剿捕幸賴

天威遠布各官宣力叅將宋燾等擒獲趙祥申案頭臨清巡捕官擒獲李鉞等緝事衙門擒獲趙雲等巡撫都御史張潤擒獲劉堂吳風子等今把總指揮趙

明又擒獲王琦等旬月之間倡亂賊首相繼擒獲地方安靖道路通行臣等不勝慶幸除將王琦等送刑部收問外臣等伏覩

大明律內一款凡律令詆載不盡事理若斷罪而無正條者引律比附應加應減定擬罪名轉達刑部議定奏聞欽此今照犯人王琦等殺人放火拒捕強姦劫庫劫囚所犯非止一死比附殺一家非死罪三人條例猶似減輕若止照常問擬強盜殺人斬罪梟首實有餘辜及照強盜詆斬決不待時正欲明正典刑以示懲戒先年罪重人犯決於市曹或圖形榜示惟

欲曉諭衆知不敢輕犯今王琦等若不速為問完餓死獄中及照常於京市處決涿州一帶為惡地方人不知見恐無以示戒將來合無乞

勅刑部將王琦等一千為惡人犯上緊問完依律比附奏請定奪量撥官軍防護押赴涿州刑部差主事一員會同巡按御史錦衣衛巡捕千戶就彼監視行刑仍圖形出榜於涿州人煙輳集去處懸掛曉諭其捕盜有功官軍趙明等本部另行查例議擬陞賞具奏施行正德十三年十月二十四日具題奉

聖旨是這強賊趙祥申案頭王琦等罪大惡極死有



餘奉法司便上緊問擬奏請定奪各起捕盜有功官  
恁部裏還通行查擬陞賞他欽此

為議處土賊以靖畿甸事

看得巡撫順天等府都御史張潤奏稱巡歷地方見  
得渾河以東往復六百餘里中間村鎮盜賊蟠據殊  
為巢穴盖由漢達雜處軍屯鱗列所以盜賊易起難  
安欲於前項地方適中去處建立衙門摘撥通州涿  
州精兵分番按伏所屬巡檢司量行那移選委文臣  
一人居中節制一節查得本部原擬行巡撫官督捕  
盜賊別有長策火速具奏今都御史張潤議奏前因

緣在京七十餘衛屯田俱坐落武清東安等處地方  
雖有縣官在彼其屯田軍餘不屬管轄以此難於禁  
制今要於適中去處建設衙門調撥通州涿州等衛  
官軍前去按伏選委文臣一人常川管理誠為有見  
但調撥別衛官軍去彼誠恐撻人情不順及添設  
文臣有礙官制俱擅難議擬查得前項本部原委  
山左衛指揮僉事王瑾在屯巡捕事有成效人心歸  
服已經奏奉

欽依見管巡捕但該用應捕人役未經處置及統  
屯堡強盜方法亦未定立又因王瑾與各衛管屯指

揮職分相等難於行事以此不能展布合無本部移咨都御史張潤行令原委捕盜通判駱用卿親詣揮河以東地方會同巡捕指揮王瑾從長勘議就於相應屯堡設立公館一所在彼住劄仍查勘各衛屯大小并坐落遠近各編立火甲互相管束就於各屯軍餘內點選精壯餘丁充為應捕合用馬匹器械或聽其自行備辦或別為處置俱從宜議處具呈巡撫都御史張潤查照定奪務在人情順便事體傳當方准施行其指揮王瑾既委提督各屯捕盜合無照守備官事體許令以都指揮體統行事各衛管屯官旗人

等俱聽管束候

命下之日本部備將捕盜責任割付本官遵依行事  
若本官果能盡心禁捕盜賊寧息照例陞賞如或怠  
慢失事擾害地方叅問罷黜本部另推相應官二員  
請

旨簡用更替其通判駱用卿仍令不時往來督理有  
功一體陞賞勘議畢日巡撫都御史將議處過管束  
屯堡禁捕盜賊事件開奏查考正德十三年十一月  
二十八日具題奉

聖旨是王瑾准照守備官體充行事其餘事宜各依

擬行欽此

晉溪本兵敷奏卷一終